

Broj: 07-02-7-27/1/08
Mostar, 14.01.2008. godine

Na osnovu člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine FBiH“ br. 13/04), člana 31. stav (2), člana 37. stav (5) i člana 53. stav (2) Poslovnika o radu Regulatorne komisije za električnu energiju u Federaciji Bosne i Hercegovine („Službene novine FBiH“ br. 59/04), te člana 36. stav (6), člana 46. stav (3), člana 48. stav (1) i člana 49. Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine FBiH“ br. 37/05) i Odluke o provođenju trećeg tarifnog postupka br. 07-02-7-03/1/08 od 10.01.2008. godine, rješavajući po Zahtjevu za sticanje statusa umješača koji je u FERK primljen 14.01.2008. godine pod brojem 07-02-7-15/1/08, podnosioca „MHE Vitez-1“ d.o.o. Vitez, Regulatorna komisija za električnu energiju u FBiH – FERK je, na II. redovnoj sjednici, održanoj u Mostaru dana 14.01.2008. godine, donijela sljedeći

ZAKLJUČAK

- I. Odobrava se Zahtjev „MHE Vitez-1“ d.o.o. Vitez za sticanje statusa umješača u tarifnom postupku i to u postupku formalne rasprave po Zahtjevu za odobrenje tarifa za djelatnost snabdijevanja električnom energijom koji je u FERK primljen 04.01.2008. godine pod brojem 07-02-7/1/08, na kojoj će se raspravljati i o prijedlogu tarifnih stavova, podnosioca Javnog poduzeća „Elektroprivreda Hrvatske zajednice Herceg Bosne“ dioničko društvo Mostar.
- II. Umješaču iz tačke I. ovog zaključka dozvoljeno je učestvovati u postupku formalne rasprave, iznositi dokaze, primjedbe i argumente i pridržavati se postavljenih rokova. Voditelj postupka može ograničiti učestvovanje umješača, u slučajevima kada je to za dobrobit efikasnog vođenja rasprave. Umješač ima i druga prava i obaveze u skladu sa odredbama Poslovnika o radu FERK-a i Pravilnika o javnim raspravama i rješavanju zahtjeva i žalbi FERK-a.
- III. Ovaj zaključak je konačan i stupa na snagu danom donošenja, te se objavljuje na oglasnoj tabli i web stranici FERK-a.

Obrazloženje

Član 53. stav (2) Poslovnika o radu FERK-a propisuje da FERK može dodijeliti status umješača osobi koja dokaže direktan interes za tarifni postupak, koji je različit općem javnom interesu, te da je umješaču omogućeno da učestvuje u postupku, svjedoči i zahtjeva informacije putem člana FERK-a ili voditelja postupka formalne rasprave. U skladu sa članom 46. stav (3) Pravilnika o javnim raspravama i rješavanju zahtjeva i žalbi FERK-a, kriterije za utvrđivanje prava i statusa umješača FERK određuje za svaki konkretan slučaj posebno, zavisno od okolnosti slučaja. Članom 48. stav (1) istog Pravilnika propisano je da FERK o zahtjevu za priznanje statusa umješača odlučuje u roku od 15 dana od dana prijema

zahtjeva u FERK. Članom 36. stav (6) i članom 49. istog Pravilnika propisan je način na koji umješać dostavlja svoje podneske i na koji je način ovlašten učestvovati u raspravi.

Odlukom FERK-a o provođenju trećeg tarifnog postupka br.07-02-7-03/1/08 od 10.01.2008. godine određeno je da status umješaća u postupku formalne rasprave može steći pravno ili fizičko lice pod uslovom da podnese zahtjev za sticanje statusa umješaća i da ispunjava kriterije: da ima direktan interes u ovom tarifnom postupku, a koji je različit od općeg javnog interesa i da raspolaže podacima i činjenicama od značaja za formalnu raspravu u ovom tarifnom postupku koji se vodi pred FERK-om. FERK je putem Obavještenja za javnost o podnesenom Zahtjevu za odobrenje tarifa za djelatnost snabdijevanja električnom energijom od strane Javnog poduzeća „Elektroprivreda Hrvatske zajednice Herceg Bosne“ dioničko društvo Mostar i održavanju formalne rasprave, objavljenog na web stranici i oglasnoj tabli FERK-a 10.01.2008. godine, odnosno u „Dnevnom listu“, „Dnevnom avazu“, „Večernjem listu“ i „Slobodnoj Dalmaciji“ 11.01.2008. godine, odredio da se zahtjev za sticanje statusa umješaća može FERK-u podnijeti do 14.01.2008. godine do 14:00 sati.

Dana 14.01.2008. godine, „MHE Vitez-1“ d.o.o. Vitez podnijelo je Zahtjev za sticanje statusa umješaća u postupku formalne rasprave u trećem tarifnom postupku, koji je u FERK primljen pod brojem 07-02-7-15/1/08, a kojim je podnosilac zatražio sticanje statusa umješaća u trećem tarifnom postupku i to u postupku formalne rasprave po Zahtjevu za odobrenje tarifa za djelatnost snabdijevanja električnom energijom, na kojoj će se raspravljati i o prijedlogu tarifnih stavova, podnosioca Javnog poduzeća „Elektroprivreda Hrvatske zajednice Herceg Bosne“ dioničko društvo Mostar .

U zahtjevu za sticanje statusa umješaća, podnosilac je obrazložio svoj zahtjev činjenicom da je nakon uvida u tabelarni pregled tarifnih stavova varijante 1 i 2 (prijedlog JP „Elektroprivreda HZ HB“ d.d. Mostar) uočio da su predloženi tarifni stavovi za prodaju električne energije u tarifnom stavu 10 kV za 20% manji u odnosu na važeće tarifne stavove za prodaju električne energije nekvalifikovanim (tarifnim) kupcima JP „Elektroprivreda HZ HB“ d.d. Mostar, te da predložena tarifa na 10 (20) kV naponu direktno utiče na finansijsku konstrukciju podnosioca zahtjeva, čime bi se ugrozila stabilnost ovog poduzeća, a što bi imalo negativan uticaj i na buduće projekte izgradnje elektroenergetskih objekata podnosioca zahtjeva. U zahtjevu je navedeno i da se prilikom donošenja odluke treba uzeti u obzir status svih postojećih i budućih malih proizvođača električne energije, te ukoliko predložena tarifa bude odobrena ista treba biti ravnomjerno raspoređena za sve tarifne kupce JP „Elektroprivreda HZ HB“ d.d. Mostar.

Rješavajući po Zahtjevu za sticanje statusa umješaća podnosioca u postupku formalne rasprave u trećem tarifnom postupku, utvrđeno je, da je podnosiocu zahtjeva Rješenjem FERK-a broj 06-03-999-09/24/06 od 22.03.2007. godine izdata Dozvola za rad-licenca za obavljanje elektroprivredne djelatnosti proizvodnja električne energije i da kao takav ima potpisan Ugovor o otkupu električne energije sa JP „Elektroprivreda HZ HB“ d.d. Mostar, kao i da se u skladu sa Odlukom Vlade Federacije BiH o metodologiji utvrđivanja nivoa otkupnih cijena električne energije iz obnovljivih izvora instalisane snage do 5 MW („Službene novine FBiH“ broj 32/02) nivoa otkupne cijene električne energije vrše primjenom korekcionih koeficijenata na iznos važećeg tarifnog stava za aktivnu energiju,

viši sezonski i veći dnevni, za kategoriju potrošnje na 10 (20) kV naponu iz tarifnih stavova na snazi, kao i da cijena električne energije direktno utiče na njegovo poslovanje.

Budući da je podnosilac dokazao postojanje direktnog interesa da učestvuje u trećem tarifnom postupku, u postupku formalne rasprave po podnesenom Zahtjevu za odobrenje tarifa za djelatnost snabdijevanja električnom energijom na kojoj će se raspravljati i o prijedlogu tarifnih stavova, podnositelja Javnog poduzeća “Elektroprivreda Hrvatske zajednice Herceg Bosne“ dioničko društvo Mostar, odlučeno je kao u dispozitivu ovog zaključka.

PREDSJEDNIK FERK-a
Risto Mandrapa s.r.